

## 歌仔戲劇本

### 劇名

誰是憨人

### 劇情介紹

米香縣的縣老爺是出了名的糊塗官，不只在公堂上亂判官司、胡亂定罪，私底下也常有擾民行爲。這天，縣老爺剛草率解決一樁爭嬰案件，突然心血來潮，要兩名捕快去尋找「憨人」以供其取樂玩耍，於是乎，兩名個性和縣老爺一般糊塗的捕快便到處去找尋所謂的憨人。

此時，奉旨巡察的新巡按孤身來到米香縣，碰巧遇到這兩名捕快，知曉了縣令的惡行惡狀，他決定要爲民除害。無奈這時巡按手頭並沒有可調度的人馬，無法直接拿住縣令，於是他將計就計，佯裝一回傻瓜，準備隨捕快回衙門來整治縣老爺。

聰明的巡按急中生智、裝瘋賣傻，一步步地引縣官上鉤，倒底誰真憨、誰假呆？一場偷天換日、以假代真的鬧劇就此展開……

### 人物

巡按官	小生，新上任的巡按大人
縣老爺	三花，辦案糊塗的米香縣令
王仔	三花，米香縣捕快
小陳	三花，米香縣捕快
村婦甲	小旦，喊冤的原告
村婦乙	小旦，也喊冤的被告
老闆娘	彩旦，路邊茶攤的老闆兼夥計
翁大	老生，擔著芭樂的過路人
衙役數名	

註：「」裡的字以國語發音。

## 第一場 愍念起

### 場景 衙門

公堂上掛著「冥鏡高懸」的匾額，「冥」字還被劃叉，旁邊改上正確的「明」字。縣太爺的位置空蕩蕩，可知尚未上班。

只見衙役忙進忙出，有的遞公文，有的搬刑具，有的剛睡醒還在整理儀容，衙門內一派慌亂。

序 曲：【唱】歡迎光臨米香縣

上蓋出名是治安

非是清廉拏斷案

實為大人是昏官

喊冤升堂就要等

撥雲見日難上難

衙門人事欲翻轉

不知何時能成全

捕快王仔和小陳各從一邊上場，好整以暇地指揮衙役們。

小 陳：欸欸欸，卡小心咧，黑白闖、黑白闖，是欲趕去投胎是嘍？

王 仔：你！彼邊垃圾(髒)，去擦乎清氣(乾淨)咧。

小 陳：哎呀，是王仔。

王 仔：叻噶，是小陳。

小 陳：足久無看到你啊。

王 仔：嘿嘿，這是這個月頭一擺上班。

小 陳：這個月？今仔日是……(掐指)二九，不就是這個月的上尾一天？

王 仔：來得早不如來得巧，我是來領薪水的啦。

小 陳：果然是高人吶，連辦公的時間攏算得準準準。

王 仔：我在公門上班這久，這其中學問毋是別人青菜學得來的。

小 陳：喔？

王 仔：嗯。

兩人相視而笑。

小 陳：是講，你最近有聽到風聲嘍？

王 仔：啥咪風聲？

小 陳：(低聲)我甲你講，你先莫甲別人講。  
王 仔：好啦，我莫講就是。欸，是啥咪大代誌是嘸？  
小 陳：你敢知，聽講咱縣內有人去甲朝廷密告，告講咱米香縣衙門攏無照規矩辦公，攏毋管百姓死活。  
王 仔：誰這呢好大膽，竟然講出這款話？  
小 陳：啊知？所以有人傳言，朝廷欲扣咱大小官員的月俸，攏會派人來調查。  
王 仔：敢有可能？咱這有夠偏僻，朝廷敢有管來這？這消息我看是假的。  
小 陳：袂吧，這是阮表哥的厝邊的後生的頭家的阿姨的契查某囡講的呢。  
王 仔：哎，牽牽這遠去，應該是假消息啦，無代誌、無代誌。就算有代誌，咱頂頭攏有人會擔著，驚啥？  
小 陳：抑毋攏——  
某衙役：(內白)縣令大人到！  
王 仔：莫想遐多，大人來了，先升堂才是。  
小 陳：唉……

衙役們慌忙排列，王仔、小陳也分列兩邊。縣老爺懶洋洋地上場，環視眾人。

縣老爺：咳咳……嗯。

【唱】愛民如子、我做袂到  
辦案如神、青菜嘛比我拏  
糊塗過日、啥咪攏袂曉  
有事來奏無退朝

王 仔：有事來奏、無退朝？伊真實認爲伊是土皇帝啊？

縣老爺：哦……(敲驚堂木)

眾衙役：威武……

縣老爺：嗯，看起來無啥咪代誌，風調雨順、國泰民安，真好、真好，下班。

內 白：冤枉啊！

鼓聲大作。

縣老爺：哎呀！啥人在喊冤枉？來人啊。

眾衙役：在！

縣老爺：將人帶上來。

眾衙役：是！

衙役下場帶上兩名婦人。

村婦甲：大人吶，冤枉啊！

村婦乙：大人吶，我才冤枉啊！

村婦甲乙互喊冤枉。

縣老爺：住口！

頓時安靜。

縣老爺：奇怪，我就抑袂問，佢就一直喊冤枉，是按怎？甲我這當作是街市喊價是無？我來問佢，佢叨一個是原告？叨一個是被告？

村婦甲：稟告大人，我是原告。

縣老爺：喔？所告為何？

村婦甲：(哭)嗚嗚，大人啊，我冤枉啊我——

縣老爺：惦去！我是問你欲告啥，你照講就好，是不是冤枉由我來做主裁。繼續！

村婦甲：大人啊，代誌是按呢……

【唱】事情由頭來說起

攏是為著一個囡仔嬰

我懷胎十月伊來出世

紅紅幼幼是真古錐

王 仔：(夾白)是甲一個囡仔有關係啊。

村婦甲：【唱】就在中秋彼一日

囡仔卻甲我來分離

不知乎誰偷抱去

母子失散就在團圓時

縣老爺：(夾白)重點置叨？

村婦甲：【唱】我街頭找到巷尾去

攏無阮囡的消息

誰知遇到這個惡婦人

抱的正是我的親生兒

縣老爺：按呢好，你(指村婦乙)將囡仔還伊，好，結案！

村婦乙：哎呀，大人啊。

小 陳：這個也有話欲講？

村婦乙：【唱】片面之詞你不可信

何況伊言語也非實情

連篇白賊是真僥倖

這天下上毒是婦女心

王 仔：(夾白)你就不是女人？

縣老爺：(夾白)講重點、講重點！

村婦乙：【唱】產婆可以來為證  
我偷抱囡 絕對無可能  
懇求大人下命令  
將這妖婦收監擱判刑

村婦甲：你講啥？這囡仔明明是我的，你哪敢甲黑的講成白的？

村婦乙：哪對啊，囡仔本來就是我生的，你才莫來相爭。

村婦甲乙又吵得不可開交。

縣老爺：哎呀，罷了！（敲驚堂木）

眾衙役：威武……

縣老爺：恁兩人一人講一款，我是欲聽誰的？

甲、乙：聽我的、聽我的。

縣老爺：攏莫吵，乎本官想一下。嗯……這嘛……嘖……這個案件聽起來真熟識，  
兩個婦人相爭一個小嬰兒，親像有故事戲文搬過。嗯……我來想看覓有  
啥好辦法來分辨孰是孰非。

小 陳：你看有法度無？

王 仔：放心，一定馬上有答案，大人擱想欲趕緊下班咧。

縣老爺：有啊！恁聽來……

【唱】公堂之上明鏡高懸  
我自稱再世的包青天  
這擺判決我官威展  
乎恁知影我智慧無邊

甲、乙：（夾白）按怎判？

縣老爺：【唱】判決如下、恁免相戰  
孩兒送去邊關、充軍收編  
雖然伊有卡少年  
軍隊欠人、伊作兵也是當然

甲、乙：啊？邊關作兵？

村婦甲：無囉，大人，你是講耍笑（開玩笑）喔？

村婦乙：是啊，你是欲用計甲阮試探吧？

縣老爺：大膽！

【唱】我大公無私、案情來分辨  
司法之前豈能胡言  
充軍的名字、就要寫明顯

縣老爺：（夾白）囡仔叫啥咪名？

王 仔：（向前問村婦，夾白）囡仔叫啥咪名。

村婦甲：（夾白）抑袂號（尚未取名）。

王 仔：(轉向縣太爺，夾白)姓野，名喚無呵。

縣老爺：(夾白)真是怪名……(在軍帖上寫字)

【唱】即時生效莫拖延

按呢好，按呢就免相爭，恁兩個會當轉去呀，這個案件結案。

村婦甲：啊？大人啊，袂當按呢黑白判啦。

村婦乙：大人，這是司法不公呢。

縣老爺：哎、哎、哎，我堂堂一個縣令老爺擱要恁來教我按怎辦案啊？

村婦甲：那是我的親生囡呢，你、你這個糊塗官哪通青菜甲阮拆分開。

村婦乙：我的阿囡仔，你哪會乎這個是非不分的昏官判去充軍啊？天公伯啊，這實在是天下第一冤案啊。

縣老爺：哎呀！住口！(敲驚堂木)

眾衙役：威武……

縣老爺：(急)恁兩個一句來一句去，全然無將我縣老爺放在眼內，分明是妨礙公務、欺官罔上，真是氣死我也，我若無乎恁一點仔好看，你以為我這個縣令是作假的，來人啊！

眾衙役：在！

縣老爺：將這兩個妖婦也一併帶去充軍，乎恁一家團圓。

眾衙役：是！

衙役們帶走村婦甲乙。村婦甲乙邊被帶走邊罵。

村婦甲：你這個昏官，我咒懺你會有報應，一定會有人來替阮主持公道！

村婦乙：糊塗的縣老爺，你一定會乎人摘去烏紗、打入大牢！

縣老爺：(氣急敗壞)恁看覓、恁看覓，我這好的父母官乎恁罵甲按呢，本來擱想欲放恁煞，好，我就好人做到底、送佛送西天，來、來、來，(寫軍帖)  
村婦甲……村婦乙……乎恁歸家(一家)去邊關算饅頭，哼！

縣老爺冷靜下來，看看公堂上所剩的王仔、小陳二人。

縣老爺：按怎？恁按呢看我，本官敢是作毋對？

王 仔：無、無囉，大人判得真對！(向小陳使眼色)

小 陳：對，判得好、判得好。阮對大人的景仰有如江水滔滔不絕、高山連綿不斷，擱親像天頂的太陽綻放光明——

縣老爺：好囉，雖然恁講話真實在，毋擱本官總是要卡謙虛淡薄，才袂太過囂俳。

王、陳：是。

縣老爺：看起來應該是袂擱有人來喊冤吧？

小 陳：嗯……回稟大人，現此時一派清和，可以講是無風無浪。

縣老爺：嗯，真好。是講……

王、陳：大人？

縣老爺：本官公務繁忙、日夜操累，也算是為國為民。

王、陳：大人辛苦。

縣老爺：正拄好，現在無事可做，不如恁兩人替本官找一個消遣物來耍，好慰勞我這個為百姓奔波走闖的父母官。

王、陳：啊？

王仔、小陳借一步說話。

小 陳：大人攔是叨一條神經不對啊？咱昨日不才進獻上新的「哀鳳」(I phone)乎伊？攔來這招？

王 仔：誰叫伊是縣令，咱只是捕頭，這人在衙門，身不由己啊。

小 陳：這下欲按怎？

王 仔：先免煩惱，看伊出啥咪招再講。

王仔、小陳回原位。

王 仔：不知大人要阮兄弟去找啥咪物件轉來咧？

縣老爺：這嘛……

【唱】我要的物件不通青菜

就要稀奇、一見就眼開

王 仔：【唱】是山珍海味、滿桌的好菜

抑是鑽石瑪瑙、珠寶甲錢財

縣老爺：【唱】金銀我真濟(多)、無放在眼內

呷了太好、我血壓會舉起來

小 陳：【唱】以上皆非、換我來猜看覓

敢是青樓美女、上水的頭牌

縣老爺：(夾白)恁攏以為我這呢膚淺嗎？

【唱】我心內願望怎樣無人通了解

王、陳：【同唱】你出一支嘴、當然嘛真悠哉

縣老爺：【唱】直接講出我心中所愛

王、陳：(夾白)是啥？

縣老爺：【唱】我要恁、帶回一個大憨呆

王、陳：啊？大憨呆？

縣老爺：沒錯！我要恁去找一個憨人轉來。

小 陳：哎呀，大人，找憨人是欲作啥咪啊？

縣老爺：講你無知識攔不承認。你敢知，這憨人想的甲咱平常人是完全無同款，講的話也比恁不知趣味外多，你講天，伊講地，你若講鬻杓，伊就講飯

篤。若是會當掠一個憨人轉來，逐工(每天)陪我練脣話，不知外好咧。

王、陳：唉……

縣老爺：捕頭何在？

小 陳：(小聲)啊不是一直企置這？

王 仔：(示意)嘖！

王、陳：大人有何吩咐？

縣老爺：命恁兩人即刻前往縣內，走找憨人！

王、陳：是！

燈暗。

## 第二場 尋憨人

### 場景 路邊茶攤

一個簡單樸素的茶攤，幾張桌椅，老闆娘正忙著擦桌、煮茶。

老闆娘：(喊)茶喔，咿茶茶、咿茶茶、咿茶茶，嘿嘿……

【唱】泡一壺觀音甲龍井

歡迎人客來飲茶

嘴乾腳酸攏入來坐

頭家娘我也可以相陪

人講賣茶講茶香，賣花講花紅，阮兜茶米的口味實在甲人無相同，我不是別人，我正是這個茶攤的女主人。唉，講半晷，也無看到半個人影，生意真歹作，真正時機不好，可憐喔我，唉……

巡按官作普通書生裝扮上場。

巡按官：【唱】御賜巡按領聖命

明查暗訪扮白身

誓將昏官來掃盡

撥亂反正為萬民

看起來這兒應該是米香縣地界，這擺我奉旨到各地巡查，沿路有聽人在講這米香縣令不但辦案糊塗，又攔擾民不斷，這若是實情，我身為巡按官定要好好嚴辦。嗯，我就是這個主意。

老闆娘：公子啊！

巡按官：喔，這位大嫂，有何貴事？

老闆娘：嘿嘿，無啦，我是想講你拄才一個人在這唱歸揼(整串)、念歸揼，會嘴乾嚙？

巡按官：啊？這……

老闆娘：唉叻，我喔，是這間茶攤的頭家娘啦，我今仔日等半晷攏無人客，想講欲分你的福氣，開市一下啦。

巡按官：茶攤？喔，原來如此啊。按呢好，橫直我也累了，抑無就麻煩頭家娘泡一壺鐵觀音。

老闆娘：好、好、好，多謝咧。來啦，這邊坐。

巡按官坐下休息。老闆娘泡茶。王仔、小陳上場。

王 仔：小陳。

小 陳：王仔。

王 仔：我問你。

小 陳：我乎你問。

王 仔：你敢知叨位有憨人？

小 陳：(想)嗯……不知。你咧？

王 仔：(想)欸……我也不知。

王、陳：(相視)唉……

王 仔：講到咱頂面這個老番癩……

小 陳：按怎？

王 仔：無代無誌來戲弄，要咱去找大憨人，大海茫茫無希望，我看咱會了白工。

小 陳：講了有理我同意，糊塗考官出難題，分明為難咱兄弟，隨便交差管待伊。

王 仔：講得好，我看阮就先歇暍一下，等一下才青菜掠一個人轉去。

小 陳：贊成。咦？有茶攤。

王 仔：行！來飲茶。

王陳二人坐在背對著巡按官的座位。老闆娘趕緊來招待。

老闆娘：唉叻，兩位官爺，罕行咧。

王 仔：嗯。

老闆娘：不知兩位官爺欲飲啥咪？

王 仔：有「沒 new」(menu)嚟？

老闆娘：啊？這是啥？阮這無這款物件。

小 陳：人這是小店，青菜點點就好啦。

老闆娘：是啦。

王 仔：好啦，抑無一杯燒仙草，冰的。

小 陳：我欲「珍珠奶茶」不加「珍珠」。

老闆娘：啊？這又攏是啥？

王 仔：嘛無喔？好啦、好啦，烏龍茶兩杯就好。

老闆娘：喔，好、好，隨來。(轉身)歹年冬，厚瘡人。

巡按官發現身後兩名捕快，心中有所打算。

巡按官：真拄好，去乎我遇到兩名官差，我就好好觀察，對他口中探聽消息。

老闆娘提茶壺、茶具給巡按官。

老闆娘：人客，茶燒，慢慢飲，莫燙到咧。

巡按官：多謝頭家娘。

王 仔：頭家娘啊，阮的茶咧？

老闆娘：來啊、來啊。

老闆娘趕緊去準備。

小 陳：是講，咱續落來(接下來)欲對叨位找咧？這米香縣講大無大，講小抑無蓋小，若是一戶一戶去找，一個一個去問，毋知欲到何時何日才會當交差。

王 仔：看起來就要想一個辦法才是。嗯……啊！有啊！

小 陳：按怎？有好辦法啊？

王 仔：咱來找一個在地人問看覓卡緊啊，欸……(望見老闆娘)就伊。

小 陳：好、好、好，這頭家娘置這送來迎往，熟悉的人應該比咱卡濟，真是好辦法。欸(向王仔提示老闆娘走過來了)，來啊、來啊。

老闆娘提來茶杯茶具。

老闆娘：官爺，茶來啊。

王 仔：頭家娘，你這茶攤仔開足久啊吧？

老闆娘：無多無少拄好十五年。

王 仔：那按呢應該嘛捌(認識)真濟人囉？

老闆娘：當然囉，對庄頭的百歲婆婆到村尾拄出世的紅嬰仔我攏捌。

小 陳：(小聲)哎、哎，我看會當問。

老闆娘：是有啥問題是嘸？

王 仔：頭家娘……

【唱】淡薄仔問題欲請教你  
望你解決阮的難題

老闆娘：【唱】作你問來免客氣  
自當盡力解猜謎

此時巡按官換坐姿，想聽仔細一點。

巡按官：【唱】重點欲來我聽詳細  
毋通漏溝錯過時機

王仔、小陳交換眼神。

小 陳：咳咳……

【唱】公堂上、縣老爺、伊下了命令  
欲捕頭、即時刻、去走找一人

老闆娘：(夾白)欲找誰人？

王 仔：【唱】這個人、要乖巧、單純的個性  
好參詳、可創治(戲弄)、想法蓋天真

老闆娘：(夾白)單純個性？

巡按官：(小聲，夾白)想法天真？

小 陳：【唱】頭家娘、鬥相工(幫忙)、奉送阮人情

老闆娘：【唱】霧沙沙、聽攏無、拜託你講明

王 仔：【唱】講清楚、說明白、大人的指令

王、陳：【同唱】找憨人、來戲弄、討伊的歡心

老闆娘、巡按官：(同聲)啊？憨人？

小 陳：(轉頭)咦？

巡按官趕緊裝沒事喝茶，還假意是嗆到而咳嗽出聲。

老闆娘：(怒)啊好哇！又是彼個縣老爺——

【唱】聞言怒火滿腹內  
又是縣令黑白來  
掠雞掠鳥是頂擺  
這遍換作掠憨呆

小 陳：(夾白)哪親像起吓面(翻臉)。

老闆娘：【唱】欺人太甚來迫害  
助紂為虐實不該  
糊塗大人若欲要  
推薦捕頭恁上天才

眼見老闆娘動氣、口出怒言，王陳二人也耐不住性子。

小 陳：火氣這大？我唱一葩(段)，伊唱一揸這大揸。

王 仔：查某啊，你就卡差不多咧，哪通順勢甲咱罵摻落去。

老闆娘：哼，我罵恁是拄好爾爾，恁彼個縣老爺平常時黑白判案就准拄煞(算了)，上濟是有代誌也莫去衙門就好。今嘛按怎，攔派恁來擾民？頂擺講欲在衙門後壁起動物園，甲阮兜的雞仔鳥仔掠甲無半隻，今嘛攔欲找憨人？歸氣(乾脆)恁兩個家已綁綁欸，家已送乎恁縣老爺卡緊，哼！

王 仔：你講話卡客氣欸喔，你這是在做生意的，阮是人客咧，何況阮身分攔是衙門捕頭，公務人員喏。

老闆娘：我管你是人員亦肉圓，緊走！看到就刺目。

老闆娘拿起茶壺、抹布要趕人。王仔、小陳閃躲老闆娘的「攻擊」。

小 陳：欸……無打到，好哩家在。

背後的巡按官趁王陳兩人顧前不顧後，偷偷作弄，害得他們中老闆娘的招。

王、陳：哎呦……

老闆娘：知影我的厲害呵，抑毋緊走？

王 仔：甲我會記得，相拄會到。行！

王陳二人狼狽下場。老闆娘逐漸恢復冷靜。

老闆娘：乎這兩籬會氣死……啊！煞袂記收錢，真正衰徹底，唉……

巡按官：頭家娘。

老闆娘：啊？人客，有啥咪吩咐？

巡按官：我是有淡薄仔問題欲請教。

老闆娘：啊？才送走兩個，攔來一個欲問問題的？

巡按官：頭家娘，你莫誤會，我是拄才聽到你甲兩位官爺相嚷，想欲了解一下。

老闆娘：喔，原來如此，你嘛卡早講咧，害我驚一跳。

巡按官：真是對不住。是講，恁是在冤啥咪？

老闆娘：煞毋知，在罵阮米香縣的縣令啦。講到阮這個縣老爺呵，平常時就黑白亂舞，歸咧縣攏乎伊舞甲亂七八糟，莫講是隨便收稅、青菜徵地，就講案件亂判、害死人命也是定定(時常)有的代誌，阮老百姓攏有苦難言，目屎對腹內吞。這擺攔卡誣(誇張)，講欲找一個憨人轉去乎伊七逃，真僥倖喔。唉，毋知何時才會有人來甲阮解救？(驚覺)欸！你敢是縣老爺派來調查的啊？

巡按官：喔，不是、不是。我只是一個普通的出外人，好奇問一下，莫緊張、莫緊張。

老闆娘：是按呢喔……人客啊，我看你單純單純，奉送你一句，若是無代誌就莫在阮米香縣流連，卡早轉去才是，若無者，唉，啥咪時陣會去乎彼個縣老爺害到你攏毋知。

巡按官：多謝頭家娘的提醒。喔，時候不早，我也應該上路囉。來，這是茶錢。

老闆娘：感恩喔，才攔來——不對，你人這呢老實古意，我抑是祝你莫攔來阮米香縣才是，唉……

老闆娘收拾茶具，下場。

巡按官：(情緒漸轉氣憤)找憨人來戲弄？哎呀！米香縣！

【唱】怨聲載道、你無聽見

恨氣沖天、你猶原自迷

代君巡狩、我掌握權力

為國為民、我將昏官除

唉呀，害囉，我現在孤身一人，手頭無官兵，恐驚若是傷(太)早表明身分，抑袂出招，昏官伊就先帶兵下手，苦惱哇……(思索)哎呀！有囉！

【唱】順水推舟、辦案用巧計

糊塗縣令、我陪伊行糊塗棋

寶劍出鞘、怎能不見血

撒網下水、決不空手回

燈暗。

### 第三場 巧扮憨

#### 場景 鄉間路邊

王仔、小陳上場。

王 仔：小陳。

小 陳：王仔。

王 仔：現在是啥咪時陣啊？

小 陳：欲申時。

王 仔：欲申時啊？抑袂通下班。

小 陳：嗯？咱若無找到憨人，哪通下班。咱若按呢轉去，大人一定會叫咱繼續找，想嘛知。

王 仔：哼，無代無誌出難題，害我汗流又擅滴，天光行到欲暗時，何時才能出頭天。

小 陳：勸你毋通攔怨嘆，越講心內越操煩，交代的任務趕緊辦，無定會赴(來

得及轉呷暗(吃晚餐)。

翁大(音發 tāi)擔著芭樂上場。

王仔、小陳沒注意到後面走來的翁大，轉身時差點撞到。

王 仔：唉叻！媽咪喂！

翁 大：有按怎無？

王 仔：你哪行路無看路啊？目矙生對叨位去？啊？

翁 大：無囉，是恁家己撞過來，好家在我有剎車，若無，我這些芭樂就去乎恁撞倒，若是垃圾去，我就了(賠)死。

小 陳：喂、喂、喂，你無稍注意一下，(指著自己一身官差打扮)看阮是誰？

翁 大：唉叻，無講無注意——

王、陳：(釋懷)嗯。

翁 大：看了出代誌。

王、陳：(懷疑)嗯？

翁 大：原來是咱米香縣的兩位官爺大人。

王、陳：(神氣)嗯！

翁 大：我咧吓！(吐口水)

小 陳：伊甲你吓。

王 仔：哎呀！你真好大膽，竟然敢吓我。

翁 大：我豈止欲吓你，我攔欲罵你！

王 仔：罵我？罵我欲衝啥？

翁 大：【唱】看到官差真生氣  
想起官府恁將民欺  
遇到代誌走去匿  
風波若過、攔來惹是非

小 陳：(夾白)原來攔是一個事主。

王 仔：(夾白)今仔日到底是啥咪日子，咱出師不利啊。

翁 大：【唱】災荒那年我抑會記  
溪裡沒水地欠肥  
皇上開恩、免稅來下旨  
縣令卻加倍來收錢  
這款的官府敢袂氣  
我翁大報仇現此時

翁大拿起籃內的芭樂丟王陳二人，王陳二人閃躲。

翁 大：這人無照天理，天就無照甲子，恁害阮兜芭樂袂結籽，我送你一拖拉庫

(卡車)卡歸氣。

小 陳：唉叻，莫丟啦，足痛咧。

王 仔：你這個刁民，真正是……(靈光一閃)欸！等一下！

眾人暫停。

翁 大：哼！知影我的厲害了吧！

王 仔：你拄才講啥咪？

翁 大：(疑惑)拄才？(記起來，轉兜)阮兜的芭樂袂結籽。

王 仔：毋是，是頂頂句。

翁 大：(疑惑)啊？喔。(記起來，轉兜)【唱】我翁大報仇現此時

王仔興奮地拍打小陳，小陳不明所以。

小 陳：按怎？你中猴(中邪)喔？

王 仔：是伊，就是伊啦。

小 陳：啊？伊？

王 仔：伊就是咱欲找的人，憨呆！

小 陳：憨呆？毋對咧，我拄才聽伊唱是翁大，敢若(好像)無同款喔。

王 仔：唉呀，這米香縣的人南來北往，也一定有各種腔口啊，對嚙？這個人恁兜無定是對別國來的。泰國，泰國腔，憨呆伊講成翁大。

小 陳：敢對？

王 仔：對啦，你沒聽過嗎？(學泰國腔)「撈班、台台」(國語的老闆、太太)。有嚙？所以憨呆變做翁大。

小 陳：對、對，真有道理。來，甲伊問卡詳細咧。(向翁大)咳咳，這位壯士。

翁 大：我刁民變壯士？

小 陳：無啦，拄才是有淡薄仔誤會，阮其實是想欲請壯士隨阮走一遭，欲好好甲你款待。

翁 大：這是對叨講起咧？

小 陳：壯士，其實阮拄好欲找一個人，誰知這不打不相識，阮欲找的人就是你。

翁 大：我？欸、欸，恁有講毋對嚙？欲找我？

小 陳：是啊，是你。唉呀，壯士啊——

【唱】拄才失禮莫見怪

只因著急才亂來

找人的任務直失敗

好不容易盼到你來

翁 大：(夾白)按怎是我咧？

王 仔：【唱】當初下令有交代

欲找的人是憨呆  
聽你號名叫翁大  
正是上天巧安排

翁大：唉呀！這不對啊！

【唱】聽恁說來有差錯  
隨便亂認會起風波  
憨呆的頭殼無清楚  
講話抑是錯誤多  
我言語正常頭腦好  
行為大方人人褒  
翁大憨呆聽毋對  
憨人是恁才差不多

我看恁真正是瘡甲無藥醫，我是翁婿的翁、大夫的大，啥咪憨呆，一丈差九尺咧。人是半路認親戔，恁是半路認憨人，憨人哪有可能像我按呢知影家已在作啥咪？彼憨人攏嘛是瘡瘡憨憨，猴獠仔看作孫悟空，我是優秀的好果農，哪通甲恁繼續在這黑白講，哼！

翁大轉身要走，王陳二人欲追回。

王仔：(叫翁大)莫按呢啦，憨呆耶！

翁大：啥咪憨呆，欲找憨呆喔？恁提鏡看就有啦！哼！

翁大下場。

王仔：提鏡？呵，我只有聽過書中自有顏如玉，哪有聽過鏡中另有憨呆人，看起來這個翁大頭殼實在有問題啊。

小陳：就是講啊，真是人是憨呆不知憨。

王陳二人相視而笑。巡按官從後面上場，悄悄靠近。

巡按官：擘！

王、陳：唉呦喂呀！

巡按官：嘿嘿！

王仔：啥咪人？欲甲人驚死喔？

巡按官：是我啊！

王仔：你是誰？

巡按官：是我啊！

王仔：啥咪是我，你是誰？

巡按官：就是我啊！

小 陳：卡正經的啦，伊是問你，你是啥咪人？

巡按官：你問我是啥人，我毋是別人，我是我啊！

王 仔：哎呀，你講袂聽(講不聽)呢，你哪會應來應去攏應同一句啊？

巡按官：你才咧奇怪咧，卡問嘛同一句。

王 仔：(挽袖子作勢要打人)啊好啊，真正是去遇到憨仔——

王陳相視，作驚呼狀。

王 仔：(指巡按)伊是——

王、陳：憨仔！

王 仔：唉呀，太好囉、太好囉，會當交差呀。

小 陳：毋攞……

王 仔：毋攞按怎？

小 陳：咱是不是要卡確定一下，才袂甲拄才同款，乎人裝痞仔。

王 仔：嗯……有理。按呢，咱就來試。(轉身對巡按)咳咳，這位小哥。

巡按官：(轉頭看有沒有旁人)你叫我？

王 仔：是啦，小哥你好。

巡按官：你好我不好。

王 仔：喔？(轉頭對小陳)伊對我出招呢。

小 陳：免驚，倒彈轉去。

王 仔：嗯。小哥，毋知你哪會心情不好咧？

巡按官：唉呀，若欲講乎你知，我就倒頭栽。用唱的卡緊。

【唱】頂頭上司來下旨

甲我出了大難題

本來自由逍遙飛

苦悶變作岸上魚

小 陳：聽起來甲阮同款咧，小哥哇，你是啥咪任務啊？

巡按官誇張身段，滿場奔竄，王陳二人隨之場上跑。

巡按官：【唱】玉皇上帝有交代

地藏菩薩出旨來

人間妖魔多作怪

要我巡邏兼仲裁

小 陳：(夾白)真辛苦哩。

巡按官：【唱】走過千千萬萬的山嶺

掠過大大小小的妖精

看遍奇奇怪怪的事件  
聽遍淒淒慘慘的心聲  
誓將天下的惡鬼掠  
欲甲歹鬼當作飯來呷  
探聽到一名鬼王的可怕  
半途煞找無彼個枉死城

小 陳：原來你甲阮同款，抑是欲找人——不是，是找鬼喔？

王 仔：咦？不對喔，這聽起來真熟識。敢講你是……

巡按官裝鍾馗身段。

巡按官：【唱】戲場扮我嘴噴火  
上界出名嫁小妹  
天師掌管陰陽地  
捉鬼將軍我鍾馗

小 陳：鍾馗？有神仙，王仔緊鬥陣來拜！

王 仔：你嘛拜託耶，伊起痾你就甲伊在憨？

小 陳：唱得太好，煞袂記伊是憨仔。欸，憨仔！

巡按官：(不滿)啊？

小 陳：我是講，天師。

巡按官：如何？

小 陳：阮想請你去一個所在，不知你意下如何？

巡按官：這嘛……(打背拱)大魚上鉤囉。(誇張)唉呀，這是欲如何是好，我就要  
攔去掠鬼，鬼抑袂找到，哪通青菜甲恁去咧？

王 仔：(拉小陳商量)這下欲按怎？

小 陳：我看這下就要用計。

王 仔：有理，你看伊這糊塗，咱就照伊的話去行。

(此曲與上一場巡按官最後唱的曲相同，稍稍改動幾字)

【唱】順水推舟、騙人用巧計  
糊塗憨人、咱陪伊行糊塗棋

小 陳：【唱】寶劍出鞘、怎能不見血  
撒網掠人

王、陳：【同唱】決不空手回

小 陳：按呢好、按呢好，大魚上鉤囉，嘿嘿。毋攔，是欲用啥咪計？

王 仔：我有法度，看我的。(轉向巡按官)天師！

巡按官：恁戚戚除除(吱吱喳喳)講煞袂？

王 仔：是、是、是。天師啊，你不是欲去掠鬼？

巡按官：是啊，欲去找鬼王。

王 仔：其實阮知伊在叨位。

巡按官：哦？真實欸？

王 仔：當然，伊就在阮辦公的閻羅殿。

巡、陳：(同聲)閻羅殿？

小 陳：叨位有閻羅殿？我哪攏毋知。

王 仔：(暗示小陳)有啦、有啦。彼鬼王就在遐傳便便在等你。

巡按官：按呢太好了，咱緊來去。

王 仔：好！來去！

巡按官：(遲疑)不對咧，是按怎我就要相信恁啊？

小 陳：這嘛……

王 仔：因為咱算是同事啊。

巡、陳：(同聲)同事？

小 陳：(小聲)啊，王仔，你頭殼也壞去喔？

王 仔：呔！

巡按官：同事？叨位來的同事？

王 仔：其實我是……哎呀，你觀來。

王仔胡亂比劃，不成套數。

王 仔：【唱】十二生肖排第二  
持又揮槍力無邊  
陽間捉拿新死鬼  
地府巡查展風威

巡按官：你是……

王 仔：我就是陰間鬼差，牛頭！

巡按官：哦？牛頭？

王 仔：呵呵，是啊，天師，咱可稱得上是同行同業、地府一家啊。

巡按官：原來如此。那這位是……

王 仔：無毋對，伊就是我的好兄弟，甲我並稱地府雙驕的馬面！

小 陳：(驚)啊，我？

王 仔：(推小陳向前)抑毋緊自我介紹。

小陳也緊張地胡亂作身段。

小 陳：【唱】原來我是羅剎馬面  
聽你解釋才知分明  
人間勾魂人無命

## 鬼域牽亡鬼赴陰

巡按官：原來是兩位鬼差大哥。變化太多，無怪認不出來。

小 陳：唉叻，陽世衙門作捕快，陰間地府變鬼差，攏是做公務人員，不錯。

王 仔：天師，若按呢你會當相信我，甲阮作伙轉去了吧？

巡按官：這是當然，既然我欲找的鬼王在恁遐，恁甲我又是地府一家，不免隨恁走一遭就是。

王 仔：哈哈，真好、真好。那按呢，你就隨阮來轉。

三人穿梭走位。

王 仔：【唱】人講作戲恁恁看戲恁

小 陳：【唱】咱搬戲陰謀藏其中

巡按官：【唱】各人各有腹內的思想

看誰卡巧誰英雄

三 人：【同唱】請君入甕是費盡思量

待見縣令、戲要演滿堂

燈暗。

## 第四場 誰是憨人

### 場景 衙門

巡按官等三人齊來到衙門門口。

小 陳：王仔。

巡按官：(狐疑)嗯？

小 陳：我是講王……往叨一邊啊？牛頭。

巡按官：嗯。

王 仔：頭前就是我講的閻羅殿，不過假作陽間公堂而已，咱不通去乎伊外表騙去，正是：知人知面不知心，外表是假內是真。

小 陳：無囉，我是看咱這公堂衙門哪親像下班咧，門攏關起來。

王 仔：現在幾點？

小 陳：嗯……攏差兩刻鐘就酉時。

王 仔：無怪，下晡五點下班，當然四點半就已經收在等了。無要緊，你去撞鼓，門就會開啊。

小 陳：我？我毋敢，我驚黑白撞鼓會乎人掠去損尻川(屁股)，死貧友莫死貧道，你去！

王 仔：我？拜託欵，莫相害好嘸，你去啦。

小 陳：你去！

王 仔：你去！

小 陳：我無愛去，你去！

王 仔：我也無愛去，你去！

王陳兩人相互推辭。

巡按官：莫吵！恁攏莫去，我去！

王、陳：欵、欵、欵……

巡按官擊鼓。

縣老爺：(內白)是誰人好大膽，竟然敢撞鼓申冤，耽誤我下班？來呀！升堂！

衙役們急忙上場排列。巡按官和王、陳一同入內。縣太爺升堂上座。

縣老爺：【唱】播鼓聲聲擾美夢

王、陳：【唱】聲聲播鼓急升堂

巡按官：【唱】暫且按兵先不動

靜觀其變再參詳

縣老爺：哎呀！(敲驚堂木)

眾衙役：威武……

縣老爺：你是何人？

巡按官：……

縣老爺：嗯？

小 陳：(使眼色)大人，就是伊啊，憨人。

縣老爺：哦？原來是伊啊。(左看右看)嗯……看起來真正常啊，恁敢會青菜掠一個人轉來，想欲黑白准過？

王 仔：無囉，大人，阮有驗明正身，絕對是妥當啊妥當。

縣老爺：敢按呢？是真抑是假，問落去就知徹底，本官就來驗貨一下。堂下何人？見了本官怎樣無下跪？

巡按官不作聲，若無其事。

縣老爺：嗬嗬，真好大膽，本官問話，豈有不開口回答之理？

小 陳：大人，可能伊乎你金光熠熠、瑞氣千條的氣勢驚到，一時之間毋知欲講啥。

王 仔：是啦、是啦。(轉向巡按官)欸，天師啊，你哪會攞毋講話？

巡按觀看了王仔一眼，依舊不講話。

王 仔：怪了，無代無誌假(裝)啞口，其中必定有詐。

縣老爺：怎樣？抑毋開嘴？哎呀！我看恁找來的這個不是憨人，而是啞口兼臭耳聾，分明是在創治(作弄)本官，連同恁兩人作夥變鬼變怪(耍花樣)，完全無將本官放在眼內。欸，也罷，既然恁無將我來尊重，我又何必對恁客氣。來人啊！

眾衙役：在！

縣老爺：將恁三人打入大牢，擇日再審！我下班去也。(作勢欲走)

眾衙役：是！

眾衙役上前抓人，王陳二人連忙叫停。

小 陳：毋通、毋通，稍等、稍等，大人請回轉！

王 仔：(罵一衙役)你行這呢緊欲衝啥？我甲你有結冤仇是嘸？

小 陳：大人，冤枉喔！

縣老爺：冤枉？哎呀，住口！本官一向正大光明，公堂之上又是明鏡高懸，何來冤枉？

小 陳：大人容稟——

【唱】找到伊、好不容易  
阮怎敢、將大人欺

王 仔：【唱】哪知伊閉口無語  
入門前擱痾話歸大堆

縣老爺：真正是按呢嗎？

小 陳：是啊，阮哪敢欺瞞大人咧。

【唱】憨人拄才有開嘴  
表明身分是鍾馗

縣老爺：(夾白)鍾馗？

小 陳：(夾白)是啊，他頭殼有問題，以為自己是天師鍾馗，這款人不是憨仔就是痾仔。

王 仔：【唱】好言相勸、伊衙門來走動  
費盡苦心、阮才能成功

縣老爺：【唱】伊不言不跪十分倔強  
恁何德何能使人順從

王 仔：【唱】阮假作熟識、招伊公堂往

小 陳：【唱】馬頭甲牛面、閻王的前鋒

縣老爺：啥咪？你是馬頭？你是牛面？

王 仔：不敢當。

縣老爺：那我豈不是目蓮尊者、地藏王？

小 陳：大人講毋對囉，你的行情無這呢好。

王、陳：【同唱】層級毋對 身分嘛不同

你是妖魔 可怕的鬼王

縣老爺：大膽！

王、陳：啊？

縣老爺：【唱】一個唱來一個唱過去

險險相信險險吃大虧

連篇痛話、騙鬼袂呷水

當我憨仔、擱聽是浪費時

哼！恁遂個遂個真正甲我當作是憨人在騙，啥咪牛頭馬面妖魔王，分明一派胡言，氣死有影。我哪無乎恁呷一頓粗飽，鮮尺啊鮮尺(意指給人好看)，恁哪知我米香縣的厲害，來人啊！

眾衙役：在！

縣老爺：將您三人推去菜市，極刑伺候，斬！

眾衙役：是！

王、陳：哎呀！嗚呼哀哉！

眾衙役又趨前要抓人，與王陳二人拉拉扯扯。巡按官眼見此景，心中有所打算。

巡按官：【唱】百聞不如親身一見

縣令惡行非虛言

巧計心機來施展

今日公堂仙拚仙

呵呵、呵呵、哇哈哈……

縣老爺：誰人？竟敢在公堂之上無故出聲？

巡按官：趣味、實在真趣味。

縣老爺：嗯？伊開嘴囉。

王 仔：伊開嘴啊

小 陳：哎呀，這下咱有救囉。

縣老爺：原來是你。堂下之人，我來問你。

巡按官：如何？

縣老爺：你姓啥名誰？撞鼓鳴冤又是爲著何事？

巡按官：我？嘿嘿，我毋敢講。

縣老爺：嗯？大膽！（敲驚堂木）

眾衙役：威武……

巡按官：唉叻，你莫這大聲，我是一個無膽的人，你莫甲我嚇驚。

縣老爺：哦？

王 仔：大人啊，俗語講得好：憨人無膽。

小 陳：不是惡人嗎？

王 仔：哎呀，差一字差不多。大人，不如先順伊的意，才好繼續問落去。

縣老爺：嗯，也罷，你！哦……(改小聲)你，叫啥咪名？

巡按官：我叫鍾馗。

縣老爺：鍾馗？

小 陳：是啦，就是伊。

王 仔：沒剉(砍，錯的諧音)，歸攬好好。

縣老爺：鍾馗？嗻嗻，原來是天師鍾馗大駕光臨，實在真好耍。嗯，本官來問你，你到公堂是欲做啥咪？

巡按官：我？我是來掠鬼的。

縣老爺：掠鬼？公堂之上充滿正氣，十方妖邪、四地精怪攏走避袂赴，何鬼之有？

巡按官：有囉，你來看——

巡按官搶過衙役寶劍，胡亂舞劍，痛打王陳二人。

巡按官：【唱】鬼鬼鬼 啥咪鬼  
天壽的餓鬼這一堆  
呷人的骨頭擱吸血  
無天無良無藥醫

追追追 追啥咪  
要追公道甲正義  
苦毒鄉親真生氣  
我來算帳正對時

打打打 打乎死  
重重下手莫懷疑  
鍾馗大王領聖旨  
桃木寶劍將鬼除

巡按手中寶劍直指縣太爺。

王 仔：(摸頭)哎呀，痛！真痛！

縣老爺：(拍手)哎呀，擊！真擊！

小 陳：(指巡按官)你黑白打！

縣老爺：(指巡按官)你打得好！  
王、陳：啊？  
縣老爺：這個人真趣味，武功自成一格，嘴內面擱念念一大堆，實在是真有巧思、有創意。恁這擺做得好，有賞、有賞。  
王、陳：(懷疑)這……多謝大人。  
縣老爺：鍾馗啊。  
巡按官：何事？  
縣老爺：嘿嘿，你這人真趣味，我欲留你在我的府上，逐工陪我七逃，陪我練瘡話。  
巡按官：陪你？無法度！  
縣老爺：啊？你講啥？  
小 陳：唉叻，無人會當拒絕大人，你毋驚乎人掠去損尻川喔？  
巡按官：我擱要四界掠鬼，無閒惦這浪費時間，除非……  
縣老爺：除非啥咪？  
巡按官：除非……(轉念)除非你通過我的考驗。  
縣老爺：哦？欲甲本官考？想我米香縣也是堂堂天子門生。  
小 陳：(小聲)家己封的。  
縣老爺：是考場人才、皇榜進士。  
王 仔：(小聲)去甲主考官烏西(賄賂)來的。  
縣老爺：驚你一個憨人做啥？作你考來。  
巡按官：好，毋擱……  
縣老爺：又怎樣？  
巡按官：這個考驗是特別爲你設下，十分神祕、相當私人，別人若看到就不准算。  
縣老爺：這嘛……你是要我將其他的人攏趕走？  
王 仔：大人，按呢敢好？  
小 陳：這個人瘡瘡癩癩，恐驚會……  
縣老爺：哎呀，驚啥？我堂堂米香縣縣令，敢會去驚一個憨仔？呔，恁太看我袂起囉。  
王 仔：那按呢……  
縣老爺：下面聽者，攏落去歇暍，無我的命令，不可入來。  
眾衙役：是！

眾衙役下場。王陳二人走到門口。

王 仔：小陳。  
小 陳：王仔。  
王 仔：你看會按怎？  
小 陳：管待伊，一個憨仔、一個瘡仔，一個欲斬咱的頭、一個提劍甲阮戳，青

茶慫啦。

王 仔：沒錯，凡事省事事省，來去，來後壁納涼。

小 陳：好！我上愛納涼，行！

王陳下場。

巡按官：人攏落去啊？

縣老爺：攏走哇。

巡按官：嗯，真好、真好。

縣老爺：現在會當出考題了吧？

巡按官：這嘛……

【唱】人講打蛇就要打七寸

出手不可慢吞吞

孤身犯險、危難全不論

想計出招、卻是傷神魂

(思索)……嗯！有囉！

偷天換日改身分

陰陽顛倒轉乾坤

我苦思良策、費心來打算

為民伏魔、苦寒來回春

我就移花接木，真巡按來作一擺縣老爺，縣老爺變作真憨人，甲伊好好教示。

縣老爺：怎樣？是欲出考題嚙？

巡按官：喔，免著急、免著急，你先對台頂落來才講。

縣老爺：啊？要我落台？

巡按官：當然喔，我無甲意擔頭(抬頭)甲人講話的感覺，你若欲通過我的考驗，自然就要先落台。

縣老爺：這人想法真怪奇，頭殼不知裝啥咪。也罷，我落來就是。

縣太爺從座位走下。

縣老爺：現在可以出題了吧？

巡按官環繞縣太爺，一邊打量、一邊碎念。

巡按官：嗯……好一扮威風凜凜的派頭，這官服在身就是無同款，咦？官服？縣令？扮縣令！(頓悟)對！

縣老爺：嘴直直唸，是攞起痞是嚙？

巡按官：嘿嘿，來、來、來，考試之前攞有一項規矩，你甲衫褪落來。

縣老爺：唉叻，不死鬼(不要臉)，竟然叫我褪衫啊，叨位來的瘡豬哥？這呢好嘴斗(胃口好)。

巡按官：莫誤會，我只是想欲穿你這身的官服，作一擺人人欣羨的顯貴，也真正扮作一回出考題的主考官。敢講，你無愛答應是嘸？

縣老爺：你齣頭(花樣)那會這呢濟。好啦，人講愛某受某苦，我愛耍就先褪衫褲，誰叫我這呢愛七逃。

縣老爺欲脫衣，又臨時打住。

縣老爺：毋對咧，我甲衫褪落來，是欲穿啥咪啊？你要我歸身軀乎人看了了喔，見笑死。

巡按官：抑無，我也褪衫甲你交換毋就好？

縣老爺：按呢毋才差不多，一人換一領，感情卡袂散，好，來交換也。

巡按官摘下縣老爺的烏紗帽、脫去他的官服，再脫下自己的外衣與之交換。

巡按官：【唱】行險棋、一步攞一步  
欲奪帥、靠智慧陰謀

縣老爺：【唱】摘去了、頭頂烏紗帽  
一時間、頭家變辛勞(雇員)

巡按官：【唱】我小心謹慎、勢如騎虎

縣老爺：【唱】我悠遊自在、甲憨人來七逃

巡、縣：【同唱】改扮身分換衫褲

巡按官：【唱】誰是老爺——

縣老爺：【唱】誰是憨人——

巡、縣：【同唱】卡看也看攞無

縣老爺：真好、真好，咱已經換好囉，憨人啊——毋對！是主考大人！可以出題了吧？

巡按官：嗯，本官就出招來，你聽了——

【唱】這個難題實在真難解  
你若完成、答應你留落來

縣老爺：(夾白)緊講、緊講。

巡按官：【唱】我即時隱藏在府內  
想欲過關、就甲我找出來

縣老爺：匿相找(捉迷藏)？這簡單，我足內行，來，開始！

巡按官：欸……

【唱】抑有後話欲交代

無這容易這悠哉

縣老爺：(夾白)哎呀！話卡濟過貓仔毛，你趕緊講來。

巡按官：【唱】越頭闔目、不可轉過來

一算到十、你目睷才能開

縣老爺：好啦、好啦，我轉身過去就是，你緊去匿起來，莫浪費時間。

縣老爺轉身閉目。

巡按官：真是假來假亦真，看我巡按扮縣令。滿堂糊塗不用心，騙恁一回換太平。

巡按官趁機坐到縣官的座位上。

縣老爺：一、二……九、十，好啊袂？

無人回應。

縣老爺：好啊袂？咦？無人回應。可能是好啊，我來偷看。

縣老爺眯著眼睛這邊看過來、那邊看過去，不見巡按蹤影。轉過身去，看到巡按高坐公堂，嚇了一跳。

縣老爺：哎呀！找到囉！

巡按官：住口！

縣老爺：住啥咪口？你敢甲我大小聲。

巡按官：放肆！來人啊！

王、陳：(內白)在！

巡按官：升堂！

縣老爺：(一頭霧水)這是搬叨一齣啊？

王陳二人急忙上場。

王 仔：人攏下班去了，伊攏欲升堂，是按怎？

小 陳：我啊知？茶就抑袂滾、椅子抑袂坐燒就攏叫阮上台，錢真難賺。

王陳二人轉身欲進門。

巡按官：大膽！(敲驚堂木)

縣老爺一驚，軟腳跪下。王陳二人正要跨進門來，也被聲音嚇到，一樣跪了下去。

巡按官：無我的命令，誰都不准擔頭(抬頭)。

王仔想偷看。

巡按官：攔看？！

堂下三人趕緊更低下頭。

縣老爺：唉叻，冤枉喔，我冤——(驚覺)哪對啊，我才是大人，我向誰人喊冤枉？

縣老爺欲爬起。

巡按官：竟敢爬起？恁將伊壓落來！莫偷看！

王、陳：是！

王陳二人將縣老爺強押跪下，又想偷看。

巡按官：不准擔頭！

王、陳：是、是、是。

縣老爺：放肆！恁兩個頭殼歹去，敢講連目矙有問題喔，看清楚，我才是縣老爺。

小 陳：唉叻，一個叫咱看，一個叫咱不准擔頭，欲聽誰的？

王 仔：袂曉佯生(裝傻)喔？這咱上擎。

縣老爺：本大人命恁兩個甲彼個憨人抓落來。

巡按官：亂來！本官才是真真正正的大人。

王 仔：咦？這聲音聽起來敢若怪怪。

小 陳：我也真懷疑。

縣老爺：恁兩個憨仔，緊甲我放開，頂面彼個才是假的。

巡按官：喲喲，恁兩人找這個憨人轉來，伊真是憨到袂扒癢，竟然講伊才是縣令。

小 陳：奇奇怪怪，到底叨一個是真的啊？

王 仔：我也毋知……有囉，咱袂當擔頭，袂曉看衫就知。

小 陳：有理。

王陳兩人偷偷摸摸地瞧縣老爺的衣襪。

小 陳：這衫是憨人穿的無毋對。

王 仔：你攔偷看頂面的彼個是穿啥。

小陳瞬間抬頭一望，又瞬間低頭。

小 陳：頂頭的穿的是官服，戴的是烏紗。

王 仔：你無看毋對？

小 陳：清清楚楚。

縣老爺：恁是看到鬼喔？我才是真的大人，這衫伊是甲我陷害，甲我換的。

巡按官：真正是憨人講憨話，這款諷古話也講得出來。來啊——

巡按官丟一塊紅布下。

巡按官：將伊嘴塞起，面甲我嵌起，乎伊袂當擱黑白講話。

王、陳：是！

王陳二人七手八腳地用紅布將縣老爺面孔遮綁。縣老爺不時踢王陳二人。

王 仔：這憨仔氣力真大。

小 陳：真有精神。

巡按官：堂下憨人聽者，你亂了公堂清靜，影響百姓權益，真是罪大惡極，現此時判你大牢收監。這國軍欠人，來日嘛……充軍邊關！

小 陳：執法公正。

王 仔：大人英明。

縣老爺：嗚嗚嗚……(掙扎)

巡按官：抑有咧。恁兩人好的不作，淨作糊塗事，竟然也甲縣令——喔，我是講甲本官同款是非不分，本官就判恁連降三級，去大牢作獄卒，甲伊憨人三個大團圓。

王、陳：啊？

王 仔：無囉，大人，阮是冤枉的。

小 陳：大人，你千萬要調查清楚。

巡按官：惦去！恁是不是冤枉，本官自有主裁，豈容恁公堂之上放肆。

王 仔：這呢鴨霸，伊是大人無錯。

小 陳：唉，這擺咱真是欲哭無目屎。

王 仔：煞煞去，捕頭甲獄卒攏差不多，同款在公家機關作事，也是鐵飯碗。

小 陳：有理，好家在降級還是公務人員，抑無咱好不容易考入來，不就吃大虧囉。

王、陳：(相視嘆氣)唉……

王陳抓縣老爺下場，巡按官志得意滿。

王 仔：【唱】無緣故、掃到風颳尾

小 陳：【唱】想袂到、慙人來帶衰

縣老爺：(嘴被堵住，硬要發聲)嗚嗚嗚嗚嗚嗚嗚。

巡按官：【唱】這一擺、除害為百姓

無枉費、朝廷來栽培

惡縣令糊塗一世

正是——

眾 人：【同唱】慘下場、下場慘、是慙人自找

縣老爺：嗚……(喪氣)

燈暗。

劇終。